

Kejayaan rombongan Dr. M

ROMBONGAN galakan pelaburan yang dipimpin oleh Timbalan Perdana Menteri Datuk Seri Dr. Mahathir Mohamad kembali ke tanah air malam tadi dengan kejayaan cemerlang. Setelah mengadakan seminar-seminar dan pertemuan-pertemuan peribadi dengan pengusaha-pengusaha di Birmingham, Frankfurt, Paris dan Copenhagen, Dr. Mahathir mensifatkan rombongan tersebut di ibu negara Denmark kelmarin sebagai "lebih memuaskan dari yang dijangka."

Dari Birmingham ke Copenhagen, 96 wakil berbagai perusahaan telah mengadakan pertemuan peribadi dengan anggota-anggota rombongan galakan perdagangan tersebut untuk mendapatkan butir lanjut mengenai peluang-peluang pelaburan di sini. Setengahnya telahpun menyatakan keinginan positif akan melabur sementara setengah yang lain ingin menambah lagi pelaburan yang sudah ada. Menurut Dr. Mahathir sekurang-kurangnya \$500 juta pelaburan dapat diharapkan dari pengusaha-pengusaha Eropah dalam tempoh tiga tahun akan datang.

Dua kebimbangan besar pelabur-pelabur asing yang menyebabkan mereka ragu melabur di negara ini masa lalu telah dapat dihindarkan sepanjang lawatan rombongan tersebut. Yang pertamanya mengenai peraturan ekuiti sementara kedua mengenai Akta Penyelarasan Perusahaan. Banyak pengusaha bimbang akan kemungkinan Malaysia mengubah semula syarat-syarat ekuiti yang dipersetujui pada awalnya sesudah beberapa tahun kemudian untuk menguntungkan negara ini. Dr. Mahathir telah memberi jaminan ini tidak akan berlaku. Malaysia, katanya, terpaksa mengekalkan rekod tolak ansurnya selama ini, dan sesungguhnya dari rekod demikian pelabur-pelabur asing tidak perlu bimbang jaminan itu cumalah madu yang menyalut hempe-du.

Salah faham mengenai Akta Penyelarasan Perusahaan pula, menurut Dr. Mahathir, adalah akibat masalah komunikasi antara pembuat dasar dengan pelaksana peraturan. Keputusan yang dibuat oleh kabinet, jelas beliau telah disalah-tafsirkan di peringkat pegawai ketika hendak melaksanakannya. Tetapi masalah ini juga sudah dibetulkan. Peraturan tersebut, menurut beliau tidak seharusnya menambah sebarang masalah. Sebaliknya beberapa peruntukan telah pula dibuat supaya kemudahan dapat diberi serentak kepada pengusaha-pengusaha dengan tidak perlu menunggu terlalu lama.

Barangkali Malaysia tidaklah benar-benar merupakan "ayruga" bagi pelaburan asing. Tetapi, seperti kata Presiden Gabungan Industri Perabot Jerman yang mempengerusikan seminar di Frankfurt, Dr. Manfred Thome, kestabilan politik dan ekonomi Malaysia adalah tinggi berbanding dengan yang terdapat di kebanyakan negara "muda". Jadi sekurang-kurangnya Malaysia masih merupakan padang pelaburan yang berumput hijau.

Bahan asal dari Arkib
Negara Malaysia